

Eir nus vain üna ierta coloniala

D'incuort ha gnü lō la vernissascha d'una installaziun da Cilgia Rageth i'l Parc dal Bogn Engiadina (BES) a Scuol. L'exposizun tematisescha il rassissem structural ed animescha da far aignas ponderaziuns.

Il proget «Reflektar davart l'ierta colonia» da Cilgia Rageth ans tira adimmaint cha'l passà nun es amo lönch na passà, intimescha d'ans occupar cun rassissem structural sco part da nossa identità culturala e'ns invida da partir aignas experienzas e nos impissamaints. L'in-

stallaziun al liber es ün proget d'art participativa cun caratter da work in progress chi'd es plüs ons in viadi. L'ouvrage dess gnir installada in tuot las parts dal pajais ed in tuot las quatter regiuns linguisticas - e quai in bundant 50 lös in Svizra. Scuol es il 34avel lō d'exposizun. L'installaziun dess cuntinuar plü tard seis viadi tras l'intera Germania fin a Hamburg, per lung la ruta da las presentaziuns etnologicas da plü bod.

Üna tematica brisanta

L'installaziun tratta tanter oter zoos umans - dimena quel temp ingio cha persunas da l'Africa o da l'Asia sun gnüdas expostas sco attracziuns in zoos. L'idea da realisar quist proget es nada avant var 20 ons, cur cha Cilgia Rageth ha cumanzà a s'occupar dal mercenariat



L'installaziun davarta nostra ierta coloniala» as echatta i'l parc dal Bogn Engiadina.

fotografia: Benedict Stecher/FMR

svizzer e dals zoos umans internaziunals. L'idea definitiva co realisar l'intent ha ella gnü l'utuon 2019. Daspö lura lavura ella vi da la realisaziun dal proget. Graz-

cha a l'importanza adüna plü gronda dal movimaint Black Lives Matter sün l'inter muond ed eir in Svizra es dvantada l'installaziun adüna plü actuala.

A Scuol as poja visitar l'installaziun amo fin als 14 settember, davo vain ella muossada a Stampa in Bregaglia. La fina-mira es da render attenta ad uschè blera glieud sco pussibel a l'istorgia dal mercenariat ed als zoos umans. «Il proget serva sco impuls visual per cumanzar ün process da confrontaziun cun nossa ierta coloniala», scriva l'artista sün sia pagina dad internet. I's cumainza a leger e vain a savair extracts da l'istorgia da nos mercenariat, dals zoos umans internaziunals e da la partecipaziun da la Svizra a la sclavitüd. Partir aignas experienzas e nos impissamaints davart il tema fa part da l'installaziun. (pl)

Visitadras e visitaders pon trametter lur experienzas a meinereaktion2020@gmail.com. Quists impuls vegan transfeirts sün folia transparenta ed integrats ill'installaziun.